



Wiehlmys
Alti
Garde

Sujet:

Raschta Baschta

Mir riskiere keini Glaage,
well me Ind..ner nimm darf saage,
vergleide mir uns in däm Joor
ass Uryywooner mit Fäädere im Hoor.
Und d Farb, soo isch's nit ilegaal,
vo unserer Hut, die isch neutraal.

E Wunder, ass nit hässig bisch
über das, was hitt alles verbodden isch.
Jo, au jeede Elsässer Bur
kunnt uss er e andere Kultur.
Es isch aber nimm z'verdraage,
wenn im Wa..is nimm darfsch Wa..is saage.
Au dr Pie..ot, dr Alt ..ank und dr Har..kin
sin Basler, aber nur zum Schyyn.
Ainewääg, doo wird'sch langsam suur,
kemme au die us er en andere Kultur.
Ych ha 's Gfyyl legal kulturell
isch in dr Schwiz nur no dr Willi Tell.
Alli andere, 's kunnt jeede draa,
eigne sich d Kulture nummen aa.

E Wunder, ass nit hässig bisch
über das, was hitt alles verbodden isch.
Die einte, die dien's iibertryybe,
wänn tschendergrächti Täggschtli schryybe.
Dr'mit's drumm keini Lämbe git,
laufft bi uns dr Winnetou und d Winetyyne mit.
Und unseri Ross, dasch gar kei Mär,
sin Wallach, also glaar binäär.
Unsere Häuptling isch e Frau
und dr Soon vom Häupling au.
Au unsere Old Tschädderhänd
isch e Frau zue fuffzig Prozänt.

E Wunder, ass nit hässig bisch
über das, was hitt alles verbodden isch.
Als aabassts Wäase joo do weisch,
verbodde wärde bald Wirscht und Fleisch.
Dr Sunndigsbroote, das muesch wisse,
isch uss Ärbli, doo wirtsch bschisse.
Uss Hafer macht me Milch und Angge,
d Kieh dien sich doo dr'fiir bedangge.
Dr'byy isch glaar, wenn'd weisch wies goot,
ass d Milch jo au uss Gras entschoodot.
Do meint e Säuli, was meintsch, wenn d Haggse
uff de Baim dien noochewaggse.
Ass Ind..aner wurtsch es kuum vertraage,
miesstisch d Ärbli mit Pfyyl und Booge jaage.

E Wunder, ass nit hässig bisch
über das, was hitt alles verbodden isch.
Rauche, will dr Rauch dieg reize,
darfsch scho lang nimm in de Beize.
Mir Ind..aner kennes nit begryffe,
wo rauche mir jetzt unseri Friidenspfyffe?
Schyynts will me, ych wurd my hiete,
au no dr Alkohol verbiete.
Dr'byy weiss me, au ooni Alkohol
wird d Biire mit em Alter hool.
Glaar, ass die, wo alles ändere wänn,
scho lang e hooli Biire hänn.

E Wunder, ass nit hässig bisch
über das, was hitt alles verbodden isch.
Bald darfsch mit dym Kaare
numme no elektrisch faare.
Mir Ind..aner sinn au drbyy,
ridde nur no mit E-Ross dur d'Prärie.
Au unseri Faggle joo per see
brenne nur no mit LED.
Dr Marterpfaal, doo sin mir stolz,
isch nimm uss Amazonasholz.
Und au's Lagerfyyr wird jetzt
dur e Wärmebumbbi ersetzt.
Denn isch au dr letschti Mohikaner,
E CO₂-neutrale In...aner.

Bass uff, ass de nit verwunderet bisch,
was ab morn verbodden isch.

D Ladäärne-Uusstellig uff em Minschterplatz und
d Waage- und Reggwisyte-Uusstellig bi dr Kasäärne
sin vom Määntig znacht bis am Mittwuch demoorge!
Deert und an de 3 Verkaufsständ (CINS) in dr Stadt ka men au
alli Zeedel und Schnitzelbängg, d Blaggedde und dr Rädäbäng kaufe.
Am Frytig, 3. März und Samschtig, 4. März 2023
findet uf em Barfi die 1. Lektion statt. Fasnacht für alli
zum Kennelehre und Usprobiere! jetzt-fasnacht.ch
D'Zeedelläasete isch am Sunntig noo dr Fasnacht 2023, am 5. Meerz,
vom Fimfi bis am Siibeni zoobe, in dr Baseldytschi Bihni
(im Lohnhof 4). D Foyer-Bar isch vom Vieri ewägg offe.

Drugg: Druckerei Krebs AG, Leimgrubenweg 9, 4053 Basel